

守

柔

齋

詩

鈔

守柔齋詩集序

守柔齋詩集蘇廣堂先生作也或者疑之謂先生文章繁
節卓絕一時由翰苑轉諫垣直聲震天下讀其奏疏者無
不仰望其丰采至觀察中州歷任方伯建鉞東河嚴毅整
肅之概百廢俱興不辭勞怨如先生者誠可謂今之剛者
矣茲乃以守柔名其集也抑獨何歟余曉之曰世知先生
之人或不曾讀先生之詩卽讀先生之詩究不知卽先生
之詩靜審夫先生之人卽先生之人細證諸先生之詩蓋
守柔之學非純乎剛者不能也今讀先生集中如雜詠雜
感諸作所謂剛柔相摩旁通其情者耶如出門行路諸作
所謂剛柔相推錯盡其變者耶如弔古卽事諸作所謂剛

柔節剛柔應柔來而文剛者耶讀至雪中讀易興至輒書
諸篇益歎心術學術因寄託而益見信乎先生之德秉乎
中孚柔在內者也先生之才符乎既濟柔得中者也周易
乾坤二卦乾君德也得天下之至健柔在剛中而見剛不
見柔坤臣道也得天下之至順剛在柔中而言柔不言剛
雖然文言不云乎坤至柔而動也剛剛無過者柔知所守
故也固知先生平日剛大之氣悉從守柔來焉余猶憶視
學粵東時先生主講越華書院晨夕過從知先生研心於
易學極深風雅其餘事也嗣先生奉 召入京余在差
次未克面晤而樽酒論文之樂無日忘之迄今二十餘年
矣先生宦汴又著有藩寓集行河集有功於世道人心非

淺其經緯鴻才真所謂柔得位乎外者不可與斯集相發
明乎或又曰先生易理精深天人奧旨何難剖析示人余
曰是又不然矣孔子學易尙思假年而雅言中有詩無易
則欲窺先生之易學還於先生之詩學求之余旣默有會
於守柔之義尤望天下學詩者卽於此求溫柔之大旨可
也先生或許余爲知言哉是爲序

同治十三年甲戌七月館愚弟全慶拜譔



序

昔鍾嶸論謝客詩興多才博寓目輒書內無乏思外無遺物名章迴句處處間起麗典新聲絡繹奔會余嘗以是移品蘇君賡堂君齒少於余十歲夾溪居相望溪南入江風雨潮汐隱几萬變衆處成獨孤賞有偶君於學敏而銳陶詠尤所好旬月不暇出所作輒移晷讀不盡又益工自始爲詩蓋無日不精進今所鈔特壯年以來三四之一葩萼藻耀移精動魄抑而按之聲聲見心悲欣往來旁觸遠覽時有所慨隱繫政俗省余前言恨古人不見君也夫才與境接出靜入動瞳矐萌折惟變所適變而成方是有本焉得其本則以不變馭至變其變可自持也失其本則以至

變汨不變其變不自知也窮本知變詩人之詩也君內行
甚懿外攝甚謹柔色如玉銀手如斷矐華腴寂素履如一
蓋有先喜愠而貞粹者頌詩知人繼綬百世不世之才況
出吾鄙君年方富遇方始方進於古而達於天下是編以
後來境何窮君善持其變矣天下之水獨行而至海者曰
瀆西江來萬里合數百源束危灘險瀨無數出高要峽始
浩然醴流以放乎海而不以瀆名天地節宣南極之氣在
隱顯間也余臥江上老屋如魚鏡尾衡流方羊幽感元思
旦夕爲濤聲蕩去不可索木隕水靜萬物擎歛憶與賡堂
別登舟賦詩酒罷天際而賡堂自此遠矣道光十五年十
月同里彭泰來

守柔齋詩鈔初集卷一 己丑

高要蘇廷魁德輔著

受業何渭校
弟廷鈞

雜詠

飛鳶無山高潛鱗無水深巧囹與香餌斯人日相尋危機
豈不悟取侮在貪饒垢泉濯愈汚春冰履輒沉損益基紐
微築隄儲淫霖廉恥以養命直諒以保心

舟居狎風濤山居善登陟性情豈懸殊艱險在閱歷夷甫
玉塵柄安能應強敵偉哉陶士行習勞日運甓披懷起雲
雷乘危莫枉席自古濟時器窮居練心力洵是天馬駒鹽
車不爲屈

宣聖疾無稱史遷惜湮滅名爲耳目寶捷足難遽竊大者

若鯤鵬小者若蜻蛚一編入蟲魚永與星河列齊士死讓
桃魯生謝綿蕝至今亡姓氏開卷見風節天稟有元精保
之光不絕遠矣千載塗只從方寸決

嵇阮託琴酒高韻千載仰彼遭晉魏間乾坤正板蕩不聞
廣武歎乃作英雄想土生聖明時任誕顏亦強孫宏老牧
豕兒寬屈都養經術爲儒宗文辭被英賞風雲亦有會志
業安可罔窺人夢窖金歡場構萬象何如藝蔬圃猶得薦
盈盈三復仲舒言羨魚歸結網

舊井禽不窺寒泉魚不肥欲處清濁間恐受中庸嗤伯夷
未可學伯始安能爲蒙叟齊物我柱史辨雄雌軒豁露本
性得失心自知周行直如矢何用嗟路歧

我愛朱公叔愛其絕交論擾擾名利場聲氣浮無根一通
金蘭譜行路稱弟昆不待相矛時風葉知離翻君章生不
負巨卿歿相存同心一人在如合江河源仲翔望知已知
已良難言

同人集彭春洲

素來

西園醉後作

青眼高歌望吾子

杜句

嵯峨五嶽胸中起拔山梗梓包層雲

伏櫪驩騶志千里陽春白日呼杯來嬌兒窺客重簾開西

江水渴入鯨口明月光蝕張蟬胎茫茫身世鬱不語誇客

且品西園梅京華舊夢

一回

首依依往日金門柳苦惜擇

棲鷗鷺羣欲招訪道崆峒叟

春洲出示寄譚康侯農部詩

我亦風塵賦

倦遊形容卻顧敝貂裘終歲饑驅走百里名山傳業負千

秋步兵肯與公榮飲北海偏知盛憲憂雌伏雄飛各自適
與君更酌樂今夕

宿佛山鎮

深夜不成眠春愁入客邊燈標高下市潮挾往來船輕別
仍鄉國前遊閱歲年斗南星落落顧影一淒然

泊珠江

久別珠江水春光爾許濃雲留海幢樹風落越山鐘杜牧
歡情異嵇康睡態慵南園人不識無地展遊蹤

春夜宴

七年不作羊城客意氣場中少相識偶從金谷醉劉琨得
似扶風逢太白江海頑雲凍不開此間花發春何來解事

天工爲狂客一花須酬酒一杯雲母屏風護春影鐵鳳無
聲燭光靜縱談不諱馬臨池愛客翻教幘投井綠酒易盡
金屈卮朱顏難比傅桑枝飛鴻巢燕來有期明日清霜侵
鬢絲十千取醉君莫惜身後安用錢刀爲君不見越王臺
昌華苑白骨蒼苔天不管那知海水有揚塵今夜潮生大
江滿

旅懷寄朴仙姪

應元

客舍紛紛落晚梅潮聲朝暮送愁來雪餘山色歸楊宅日
下春光到漢臺眾鳥儘知高樹託名花偏愛後時開閑居
奉母君堪老猶勝傭書只費才

花朝

春夢難尋酒易消
蝶慵蜂鬧判今朝
夜來曾把殘紅掃
不與東風見寂寥

復寄朴仙

積雨初晴草徑開
翩翩白袷步蒼苔
日銜珠石隨潮落
風過花田帶蝶來
到眼只驚春是夢
楚胸難把海爲杯
此中不少山王貴
那得林間小阮陪

河南竹枝詞

十二珠簾日暮開
新妝花簇鬢雲堆
生世不知離別恨
一巡潮水快船回
玻璃轎子綠紗遮
昨日花朝去看花
撲得一雙大蝴蝶
小鬢扶過素馨斜

龍洲巷口海珠邊楊柳青青繫畫船三枝伽楠兩元寶金
花廟裏卜金錢
百鳥啁啾春氣暄平臺曲榭綠陰繁遊人日斜自來去誰
家買得好花園

早起

燈影明殘夢人聲沸早潮微風花露泣落月柳煙搖宿蜨
春添恨流鶯語自嬌想從揮袂日相憶到今朝

貧女篇

天上十五月人間十五女過時損光彩諒節徒自許女生
本貧家性命託機杼精縑滿筐篋玉體泥麻紵東家嫁女
歸侍從塞門戶鴉頭列珠翠鵠立伺仰俯眩座繡衣裳半

出手中縷少小兩無猜會面一爾汝芙蓉不知寒松柏不知暑醉飽或調飢相視殊肺腑

主人爲作西洋筵卽席有贈

珠毬紛挂星垂芒百花環坐條風香玻璃盛酒琥珀光銀
叉銅鼎燒羝羊麪龜雞饈破塊膏妖童妙舞氍毹張畫鼓
一聲進一觴主人稱壽樂未央鳴鐘番奴奏宮商應時拍
翅金雀翔杯停點茗分旗槍此間賺得春宵長東隣翁媼
屢糟糠白首不識膏與梁壯士擊案歌慨慷盛年沉醉留
他鄉

楊枝詞

玉燕金蟬翡翠翹屏山一角掩春嬌東風只戀閑桃李不

管垂楊千萬條

斜拂紅樓映綠波
雲癡雨膩澹煙搓
浪傳通體能傾國
觸著春風絲緒多

碧草連隄野蝶飛
赤闌橋畔日依依
愁眉不展春山暗
盼斷驪駒歸未歸

白絮漫天風未停
鏡痕點碧嫩萍生
木棉百尺花如火
照見殘春一片晴

東風

獨與東風語春深
不憶家一鶯啼
午日羣蝶聚孤花
山色湘簾入簫聲
錦幔遮冶遊行處
好煙月是年華

客至

向曉東風急扁舟正欲歸酒中逢客至春半有花飛釀蜜
蜂偏靜隨人鶴不肥相歡拚一醉莫待壯心違

雜感

青陽聿云暮幽花方懷新獨表荊棘中充佩宜美人美人
見無時馨香誰與陳離披不自惜恐負雨露恩爲君結嘉
實歲晏登玉盤莫剪當門蘭同類爲悲辛莫植苑中柳秋
風易摧殘

宋石一逢時價重明月珠亭帶足自珍千金亦不如貴賤
無常局取舍無定塗江翁譏狗曲王生辨驪駒豈謂經術
士意氣徒區區感此坐嘆息大智當若愚

升高勿反顧陟遐勿卻步取道心不專驚疑委中路材秀

有時出璆鉞成磨鑄意狙耳目前矜奇據陳故途暗一竄
迷精沉九州驚懷腐無由香得師日開悟

釣魚不設餌取適非爲魚讀書不求解得意非在書物理
今古同事變前後殊一撥眼前翳照以胸中珠賈生與諸
葛何必爲醇儒

陶朱善隱迹白圭誇治生鷺鳥猛獸心詭託仁義行程鄭
述諸孔藉藉富世稱子長本厲憤反重貧夫名遂令朝馳
器下與駟僧并奸宄競錐刀汰侈法網嬰不如游俠傳猶
有出羣英

海邦富寶貨大戶資豪奢千金一歌鬢百金一叢花興廢
廢窮參侍婢賤綺羅質緣託青雲氣餒凌丹霞豈知金玉

堂百鬼以爲家敦朴化以儉賡平遺愛多

陸生定百粵歸受千金裝示彼漢使尊豈與清操妨寥寥
經綸才擾擾寶玉鄉誰還合浦珠誰投海南香可憐媚川
郡增置貪泉旁英英孝肅公一硯擲西江至今芳洲上歲
時薦椒漿大府懸冰壺海波庶不揚

徐甲御青牛頂軀辛通靈蓬萊多仙子此輩蟻蠊輕遊戲
到人間禍福肆憑陵上界官府嚴鞭笞有常刑月宮斫桂
者辛苦近千齡未覓浮邱伯何知安期生

誰謂凶年穀不如豐年玉玉爲富家珍穀飽饑人腹蚩蚩
世好殊無心辨種稂穀平寄汝命力穡望秋熟玉乎莫輕
投恐遭按劍辱

惜春

晴日當花熱春風引柳顛
盛時行樂耳孤館坐蕭然
氣斂青萍匣歌思錦瑟絃
物華同晚晚搖落易窮年

夜

參旗西轉挂簾鉤
獨立涼階夜似秋
風過雲屏花影活
泉鳴石鼎茗香流
江城萬戶沉魚鑰
蠟炬雙行出翠樓
歌舞未終殘月上
天雞已唱海東頭

哭月查姪

應祥

抱璞人歸黯自傷
無端噩夢斷離腸
險辭采石騎鯨客
丙姪 戍出京得惡夢過
洞庭遇風舟幾覆
空覓蒙山脯鳳方
子美招魂勞剪紙
維摩示疾靜焚香
那知雞骨支牀日
風獵莪蒿泣路旁

社燕初飛埋玉時
珠江風雨赴書遲
投篇句愛溫岐豔行
詩中有姪入夢心憐衛玠羸
似聽承塵來怪鳥
況經廬墓感
馴狸隱憂耿耿重泉閉
欲問巫陽恐未知

久雨

花落人何賴
春殘雨未停
江浮簾幙白
草隱蕙蘭青
長日啼饑鳥
深宵聚溼螢
濁醪難强醉
愁思已沈冥
苔滑蝸爭出
枝深蜨暗藏
芭蕉連夜展
竹笋對人長
詩卷消三月
年華滯一方
望晴知未得
鄰院故調簷

春遊

園枕清江接翠微
降王此地剩芳菲
乘潮喚渡匆匆過
冒雨尋春緩緩歸
一簇桃花攔路出
誰家燕子趁人飛
歌樓

無機無相識掃地焚香又下帷

寄家書

寒溫惟夢自騎泊與貧長不稱充閭意翻勞負米望鶯花
空過眼日月入迴腸海燕春無限將雛瑋瑁梁

寄友六首二首

天工不授業百藝尊其師嚴憚在方寸神采生四肢初學
弟子職禮數童習之今聞夏楚威乃忤富家兒材美拒斤
削良工安所施經生恥素食况比嗟來時

鶴鳬各成性鵬鷃同一天生物不齊適性歸自然逍遙
漆園叟掉頭軒冕前士窮貴得已失已將何傳詩書託吾
命衣食隨世緣且尋泌水樂勿賦北門篇

題米元章拜石圖

巢陽仙吏折腰時祇有飛星化石知一事調君應失笑袖中輕易獻瓌奇

海岳名齋要是狂奇章甲乙費平章竟同尤物能傾國誰啟宣和花石綱

故鏡

蘭閨照夜月仍圓萬劫寒灰撥眼前能使紅顏無白髮壺中何事說神仙

西漲行

九天雲垂海波立老龍欠伸雷雨合一夜金隄貼水平萬山銀竹排江急牂牁建瓴勢莫當尊關飛渡驅羚羊忍使

黔黎作魚鼈直教陵阜浮杠梁唐虞平世有饑溺自愧許
身非契稷卅年幾見洪流災百室惟聞草根食我今留滯
珠江南傳說沈舟日雨三登高遠望駭精魄白浪突湧山
嶄巖因思飄泊窮簷古編篷架竹棲兒女顚天誰抱鞠人
心此地猶喧賽神鼓安得五丁生世間持斧爲鑿西南山
分支入海快宣洩下土反宅蘇惇鰥宣房塞兮漢皇悅近
歲竹薪茂條蘖文命由來明德長北河莫比西江決

聞陳台垣同年

星

禮闈報罷

不辭風雪往來頻七十於今老斲輪槽櫪難馴千里馬門
閭時倚百年人途窮淚與黃金盡氣結文翰白髮新南望
飛雲歸計迫燕臺回首又傷神

夏夜

淺夢聽潮覺微涼繞竹行月華昏水氣風力稱人情高樹
一蟬警遙空雙鶴鳴離居既多感又逐見聞生

行路難

百川之水晝夜流人無清濁勞不休撫節高歌行路難一
日躊躇思千秋山王嵇阮共杯酒絕交敗意言不雙富貴
若能屈志士泰山應逐洪濤浮

明月之珠不以逐六七寶之刀不以刈穀虎豹變化當遇
時豈有文章傲流俗五月披裘呼拾金季子失言老翁辱
平原結客三千人毛生處囊儕碌碌眼前物色少真賞何
况萬里通脊屬

游開公子聲氣多繡韞金絡聯轡過牙盤供饌宴清夜龍
鎗瀉酒傾黃河楚絲輕撥碧雲落朱櫻齊綻相和歌平生
持籌積鞅掌一時行樂無蹉跎無蹉跎萬事足笑爾東西
南北人駿馬如龍歸不數

畫船載酒寫我憂中有美人彈箏篴聲情宛轉不入意望
望江心雙白鷗雙白鷗長相隨如此風波爾何知世路雖
云險覆舟之下無伯夷

皓月欲落白露零朱樓垂幔燈熒熒裴徊庭外夜過半微
聞思婦愁嘆聲借問思婦何所苦良人行賈事遠征去時
遣我鴛鴦錦翡翠繡帶金瓊英通天犀釵木難串十載委
篋塵土疑昨來客寄一紙書昔在漢廣今秣陵關山脩阻

歷寒暑憐君流宕涕縱橫我感此意不能寐人非禽獸誰無情

野鶴巢林憂燎原旅舍願得牆宇堅牆宇之堅不如主人賢芻茁起病馬沽酒娛客日千錢楚王敬穆生置醴穆生前一旦忘設醴穆生返駕無少延黃金可作世可度人生何復苦行路

狂歌行戲星命者

黃頭郎君鑄蜀山餓死不得名一錢牧羊長者陳輸邊竊取卿相明主前人心巧拙命亦異集枯集苑非徒然力田善賈有餘食寡欲引氣多高年若云位置眞宰定林甫骨相應神仙丈夫置身天地間榮華坎壈同雲煙子雲逐

不解事貧非我輩誰爲傳勸君莫究三命說季主遺文重
史遷

夢與春洲遊所至峻絕非耳目境快然有述

凌虛覽元化九州不在外東西日月馳俯仰天地大異香
蓄雲氣遙音遞風簾續紛萬影眩雜還衆靈會翩然挹夫
君連襪接巾帶和歌金石奏永嘯螭鸞隊爲指來塗惑莫
辭生世隘勺波具滄溟卷石攬青岱靜照理自超俄頃閭
人代古歎馳夢魂塵土付一嘅

畫虎

雙睛如鐙尾矗矗猛虎坐林視飛肉簷前鵲噪風吹腥垂
龍挾雨飛前楹張鱗拳爪勢相角熟視乃向空中行嗚呼

封使君氣燄能驚人畫者豈是裴將軍射虎十百傳虎神
泰山之婦倘見此碎裂皮毛罵佞鬼

寄陳愚谷堯桂源第二峰精舍

朝沐松下露仙液迴鬢蒼夜眠石臺雲江氣侵肌涼棲幽
屏妄跡諸天闢妙香時繙貝葉書悟徹眞源長涉有月留
影鑒空水涵光愧非同懷客頗遺物慮忘寂境昔游踐願
言追翱翔千峯薜蘿衣五字瓊瑤章會因秋風夕吹夢來
君旁

六月十五夜翫月

江月無端墮客前葛衫蒲扇與周旋搖搖樓觀潮來處澹
澹星辰雨後天照向中閨先夢到看從今夜待秋圓悟

百尺樓孤鶴遮莫吟聲攪爾眠

種菊偶作

菊晚新苗帶雨移無論晚節意相宜朝來枝葉猶憔悴想
見淵明乞食時

憶鶴行

庭外竹竿挺疎節庭內詩人抱窮骨招來雙鶴形翩躚如
竹可愛人可憐倚竹狂歌鶴爲舞傾情寫意成賓主江城
萬戶紅塵多竹間差喜無爵羅昂藏未屈凌霄勢月午風
高數聲唳交少孤山處士清夢無淇水乘軒貴一朝翮成
摩碧雲眷粉留詩惟此君往日池亭借顏色從今雞鶩誇
精神八表翱翔爲誰下三清好逐仙眞駕故人磊落絕恩

私莫效野田黃雀謝

晚眺口號

江上烏烏黃雀風遠帆天矯去如鴻連雲樓閣迷南北只
有青山入眼中

夜坐

碧空斂纖雲素月寫羣影龍尾暗西轉參旗儼東整風柳
疎螢流露梧宿鶴驚欣戚物自喻予懷更誰省明河睠靈
匹縹緲天衣冷捐珎交悲歡同鑣悵俄頃死生有情別神
仙定心領孫楚婦服除莊生蝶夢醒孤羈怯夜寂三商逾
歲永秋聲何茫茫人海嗟汎梗

寓目

朝來涼雨洗仙城，簾幙千家夕照明。
芳草猶含春夏氣，寒蟬忽變短長聲。
滄夷舸艦颶風至，江海珠璣待月生。
擬覓錢刀爲大買，不聞程鄭有商名。

登越王臺

不見騎羊五老仙，防身一劍影蕭然。
羅浮出沒層雲裏，江海澄清落日前。
南漢霸圖餘鐵塔，西洋貢道接樓船。
盤盤歌舞岡頭樹，曾閱昇平二百年。

秋夜放歌寄懷諸故人兼示舍姪朴仙月樓

維熙

東望不見羅浮仙，西望蒼梧雲氣連。
南溟龍伯睡蛟室，斗樞北揭高高天。
天高安可攀，四顧慘客顏。
平生交遊有豪傑，幾輩數奇生計拙。
不辭飄泊等浮萍，共詡孤高學明月。

陳雪漁

立春洲

糠粃章句儒窮愁垂老思著書玉筍班頭

有區冊

靜齋

頁米將母身忘劬有人捧檄方馳驅鄜州從

事譚大夫

非石

古岡逸才後山後

陳笏

燕臺歸馬鞭珊瑚

青衿白首事鉛槧瘦狂太瘦

何星查

愚谷愚

陳子昇

手握靈

蛇珠

溫陶舟

養疴講學城西隅迢迢一水限來往況彼數子

山川殊山川殊歲月速蝴蝶黃時園橘綠燕雀羣飛笑鴻

鵠丈夫生世何刺促感逝傷離亂心曲長吉空留致酒行

李嘯臺

虎兒早赴脩文錄

舍姪月查

入江湖汐有迴流別樹華蕤

無再馥宋玉悲秋太白譏仲宣作客不相宜莫云高志局

四海但願巢林棲一枝呼羶鶴

月樓

招抱朴

朴仙

和我懷

仙歌爲我彈素琴長溪一曲傳清音風流更有傳休奕

玉

舟形影不愁商與參胡爲流宕異鄉縣菊芳蘭秀時沾襟
君不見珠江風月美清夜極目故人秋水深

傅玉舟

理光

來訪信宿話舊有作

長溪入西江合流無向背總角定君交疎狂得君愛初生
松柏性夙具風霜概弱冠獵文圃衆芳結長佩形愧聯車
潘鬢竊同郡戴摩鋒萬夫勇懷璞三刖退頻年饑驅迫客
處神思瘁星離感參辰節換忘朔晦似知羈鶴愁來及賓
鴻會乍喜病顏失靜與秋月對鏡窺髮蓬葆酒澆胸壘塊
置身甘後時違俗自故態珠光不藏塵玉屑方下礧機緘
證新獲芹藻芟餘穢養材匪朝夕蓄意關遠大期君羅浮
巔平視恆華岱

寄贈溫陶舟

繼

襟抱明光紫玉簾
盛年流宕病愁兼
久拚心力研經苦
微試談鋒論古嚴
寄廡曾無家四壁
賣文還斲字三兼
江城相望秋風裏
古寺宵寒月入檐

中秋

半醉他鄉夜中秋
小雨天金堂留客冷
壁月背人圓尋夢
疑將曉追歡可隔年
青燈花爛漫只解照無眠

十九夜偕玉舟待月時玉舟將歸兼呈春洲

萬古一明月獨與中秋宜
中秋月無光風雨乖素期
及茲夜深見已異團圞時
良知重契濶嘉會憂將離
一氣沉壑分相失蜚蜚思
庭前碧琅玕交柯兩因依
余腹置君心伯

神童古歡場脩阻往夢符容儀容儀共衾枕莫苦驢
駝努力愛盛顏姑酌金屈卮

君歸訪酒徒隔江紅蓼居爲余致殷勤莫惜多寄書昔余
萬里遊結交此士無此士棄草澤濁水含元珠逃名鑿坏
外肆志變生餘西園風露深清輝抱影輝長嘯聞天關高
瞻監寰區三月不相見孤蹤若爲娛秋林倦翼棲野草駭
羣呼寒蟾爲誰鑒坐此迴腸紆

辨上人石琴詩

上人新
州人

老僧與佛共桑梓齒牙泠泠瀉秋水石琴橫座長於僧海
外移情眼前是神工戲割于闐璞宛出雷家巧確斷仿古
應名混沌材卽今不數璠璵樂禪門靜抱忘知音紅塵對

此清我心參至南宗無一物風旛縹緲香雲深

友人爲余述所聞見有可歎者要余賦詩事非一時

故章無倫次義存諷諭庶幾聞者足戒云爾

嶺海風清坐嘯秋身兼三組漢諸侯瓊筵爭賭鸚鵡錢錦
段多歸翡翠樓傳道建威臨越鎮何勞執憲告交州龍驤
酌水題詩處鳬舸揚旌訪古遊

蓬萊仙吏舊知名任達疎慵洵有情力拯魚頭勞障水生
來猿臂善談兵陶公壁運分陰重桓發金輪博戲輕錄事
錢家多俠客洞翁華髮念蒼生

李郎年小擅歌場日坐朱門燕寢香花下濡頭逃酒令燈
前假面學談娘鴛鴦鎖絡蕤結琥珀鈎生的皜光會

東山綠竹意勤君行樂莫相忘

十丈紅塵暗醉鄉
頭歌舞惜荒涼
何來日下埋輪使
驚散春風結客場
漢殿果應冠獬豸
多坡山不久駐仙羊
口碑今比閭羅老
當日誰陳借寇章

專城迎入泰娘居
茵母分張紺幃車
春雨泥愁花別樹
秋風斷夢葉題書
填橋未省酬烏鵲
垂餌翻教困白魚
三十六江樓下水
可堪流恨滿歸墟

輕費真珠惱復憐
綺羅叢艷度華年
攀追石尉能文友
菲薄何家置食錢
眼底好花迎意換
懷中明月逐時圓
紫標紅榜風沙散
才覺人前歎逝川

旅懷寄區靜齋

慕濂

采菊紉蘭節暗過客懷爭得不蹉跎牀頭金與秋花盡囊裏詩同落葉多勤苦易成思稼穡登臨無和憶羊何江城小閣經年別誰溯潯川聽棹歌

悼姪孫起蛟

憔悴三秋折上冬青天難問九關重不傳楚玉連城價遽缺干將出匣鋒園吏盆歌空作達起蛟失偶在百日前步兵琴酒竟

無宗謂朴仙紅蕉閣外春來恨總使鄉閭爲罷春月查姪歿於春仲皆

族人所愛惜者

結交行寄陶舟

種蘭不許生邪蒿鑄劍那得資屠刀男兒結交有本性羅浮一合天南高才名爭道韓陵石悔十年前漫相識一夜

秋風眠對牀攢雲覩月開胸臆古人氣誼膠漆堅今人因
依桃李妍把臂傾心脫手忘空指白日當中天知君莫過
彭子陽謂春謂君言直詩筆狂愛君莫過陳元方謂台謂
君獨行傳異鄉我願交君始二子乃今逐駕龍媒行貧賤
相看贈何物終此身窮志不屈買絲莫繡平原君但繡豫
章雷與陳

題洛神圖

高唐神女諷荒淫洛水通辭亦此心銅雀秋風歌舞散西
陵墓樹起哀音

秋菊春松絕可憐黃初空附感甄年誰知南漢風流事貌
得蟾妃扇子僊

守素齋詩鈔初集卷二

庚寅
辛卯

高要蘇廷魁德輔著

受業何渭校
弟廷鈞

七絕

今年花事一何速正月爛開紅躑躅去年冬臘天氣和自
秋不雨江無波菜畦麥隴圻龜甲枯井只見泥鰕多種花
之家聚游手百錢買水如買酒曲徑鋪青絕點塵高闌灑
雪承輕帶紛紛豪少仙城西開春賞花色色齊綠蛾自添
雙鬢媚遊檻不惜千金揮嘒鳩忙殺蝴蝶閑遊人三兩來
花閒見說農家有饑色賣花卻得雕盤食

得朴仙書卻寄

別來惟恨寄書遲尺素緘愁慰叔癡日校巾箱三兩卷奈

君忙甚是閑時

大江東去想宗風不數新詞柳七工四十年來憔悴意誰
聽流水出枯桐

新晴小飲

煙雨初消畫景遲湘簾風動碧漣漪芳心處處梨花發旅
況年年燕子知闌澤傭書差得計揚雄箴酒恐非時日車
翻卻春須老遙對松山盡一卮

答靜齋書

靜齋去臘博亡
今春就館新會

春風吹來雙鯉魚尺素喜是湓川書披緘細讀語悽惻行
間淚迸鮫人珠旅館陰森坐如夢兩年對酒無君其怨
桓山別子烏驚摧樂府將雛鳳憶昔相從戊子秋悼亡

岳爲君憂嬌兒失母幸無恙續絃膠已來麟洲不謂命途
君更舛七十衰親翼遺卵安知憂患非玉成好斂英華入
銀管星光作寶劍篇郭公逸駕前加鞭傾河倒峽有餘
地追風逐電無遙天勝國文宗海日子三百年來耳孫起
與君旗鼓怯相當示我璵璠況能理來書屬訂詩草擊缶之歌君
莫悲只看身上密縫衣此詞一寄遙相憶瞥見伯勞東向
飛

春曉曲

曉風吹衣嫩無力凍破梨雲見春色黃鶯恰恰啼高枝知
爾多情今爲誰花底韶顏惜芳節鴛鴦夢醒溪水裂東西
樓閣珠簾開已有賣花人過來

表兄歸自南寧述余外舅問訊甚悉悵然成篇

粵西天險崑崙關雲峯影落烏蠻灘彭郎去歲客遊此欲
覓錢刀得山水歸舟訪我江館來花底共酌玻璃杯酒酣
傳道親串語棖觸往事悲離裁博翁相期總角日嘉婚申
結膠投漆十年兩地隔清塵別鶴離鸞歎空室小兒天性
識外家學語便指東洲沙翁時久作邕州客垂念遺雛淚
沾臆因君邂逅訊平安憐我浮沉生感激丈夫幾許國士
知窮途懷舊多哀思海潮不到三江去東望應歌前日詩

外舅西上時索詩贈別嘗從
玉舟處取余舊作數篇將去

晚望

歸鴉忽動倦遊心芳樹龍蔥倚越吟少日風情詩外減故

鄉春色客邊深琵琶洲暗聞歌響鴈翅城低入眼陰不獨
離憂自惆悵越雲漢苑幾升沉

瘦鶴行寄月樓

瘦鶴瘦鶴生青田元晴高鼻霜毛鮮願按鸞皇遊九天雲
羅一觸聲淒然潭阜瑞粟溶溪水悄伏幽叢那得此吞聲
不食雞鶩餘病翻離徙飛不起桂林翡翠光歲蕤龜茲孔
雀金屏開白玉堂前動歡賞比爾藻質皆凡材應節舞吳
市唧珠感韶琴知爾獨抱清迥之明心耳目近玩夢難任
使我一見涕沾襟鶴乎人間何處逢噲參激風直到三山
岑相報豈但干黃金

送春日作

一春不逢三日雨轉眼春歸無處所江深海闊蛟龍蟠何
日雷車爲追取帆檣影接朝洪臺闐闐喧傳洋米來窮陬
下邑阻同易富家高廩封賈財布穀聲乾耕不得典牛鬻
糶謀朝夕頗聞萑苻羣盜嘯無使鋒刃饑民識祝融司方
氣如炙清明風至勾芒謝光景流連想去年郊原索莫驚
初夏燒痕遍野草未青五嶺周遭夕照明欲進杯觴遣愁
思何須客子念蒼生

新園飲假山下戲題

奇峯層疊夏雲生飛落樽前勢未平海上蓬萊仙夢穩不
愁驚濤撼山行

西洋人汗得能漢語略解魯論文義介通事楊某詞

余問字歌以紀之

宣尼木鐸代天語一警愚蒙萬萬古

聖人御世入荒集同文遠被西洋賈窄衫高帽款門至碧
眼停觀若心醉誰教奇字訪揚雄豈購新詩識居易通辭
不減葉河王就書魯論三兩章自言孝弟是吾寶更慕有
朋來遠方曰本朝鮮重文籍於今益知素王力鯨鯢穴伏
溟渤青翹首神州日華赤在昔康熙正三統象牙龍腦部
珍貢節度爭稱汧國李都督時來廣平宋島夷懷德二百
年樓館鱗比城西偏中朝不改旅葵冊絕域應焚亞孟編

他國
雜文

觀技作

八尺長杠鼻端舉當風不動元如柱一人導前胡旋舞一人逐後搦腰膂舉杠者行暗不語忽然杠動側頤挂兩人接杠肩架之仰足倒掛拳凍狸翻身斗作猿子嬉烏辯若挽轆轤絲手自引身身不知萬人喧呼海波湧都盧尋橦空爾爲吾聞抽身之力山可拔屏風上行鎖子骨今汝此技非其倫趨捷或過鴉兒軍餓鴈在韝得食馴醵錢溢篋酬苦辛但無吳中草聖張長史誰悟筆勢一髮懸千鈞

謝易君山畫

寫澗水空山道柴門老樹邨詩意

何處移來山水窟山陽人家春氣活細流石激寫琴心古木雲歸潤龍骨少陵詩境今有無易老卜築桃源湖中魚鳥樂相樂意悵勝憶羌邨居不樵亦不漁能醉復能醒

身似喬松日邁影繁華過眼冰雪冷門外紅塵萬竹遮林
間清夢孤蟬警興來落筆天機精直使李范豪端生炎曉
灼人汗如雨傾耳忽到風泉聲長溪之曲草堂在對此我
亦思揚舫不然徑訪桃源去酒酣掃壁書長句邀君更畫
羅浮圖著我丹崖最高處

端午日泛舟遊唐荔園

蒲觴一醉天中節畫船來往波紋縵十里青樓駕海風四
圍白葛飛江雪城東濠至城西門遊人如織繁吹喧柳波
涌裏巖清勝訪古來過唐荔園園環綠樹荷千頃玻瓈照
動明妝影涼生雲幄坐頻移飽啣天漿酒初醒鄭公賓客
唐老儒曾陪旌旆園中趨不數紅雲設宴日漢家但有留

仙裾芳華廢苑今何在夢徵風韻垂千載空憐花塢半塘

存難得丹砂錦洲採

曹夢徵詩有樹上丹砂勝錦洲句

事殊興極彈指間

昔人陳迹後人歎結君續命絲千縷誰似奚囊九轉丹

節後夜飲新月下作歌寄眷洲

脩眉窈窕天開鏡末麗風香夜光靜停杯不語幽興生玉

蟾對影心空明猛然濡筆題粉壁古屋精靈暗辟易昨日

龍舟爭錦標金鼓聲動江迴潮一掃勝負視壘欄自古飛

騰思鸚鵡君不見議郎文鋒起南越此地曾飄洛陽雪炎

靈劍璽光久滅孝元宅樹今能說人間俯仰三千年松嶺

幾閱豪華遷手中醇酒非夢公襟上澹月相周旋歡來恨

少同心子坐憶西園老名士招涼石畔應未眠高誦離騷

瀉瓶水安得黃鵠迎君來飲君木瓜三百杯

漫興

客心無一事物候頗相關雀變風移海龍分雨界山玉蘭
榮夏萼金菊誤秋顏

時二花並開

自古災祥志傳聞略百蠻

贈別盧孝廉

家駒

盧子神峯峻瘦柏飽霜氣賦詩不求工輒與古人契與酣
一揮霍榛菅擢蘭蕙冷面寬所諧雄心素難制規以柱史
言廣以南華意完角思祥麟鑿蹄得馴驥平生獨余屈此
情感君摯風送江門潮雲開富山霽君歸莫相念且作銷
愁計得酒萬事休多書醉鄉記

漱珠橋酒肆聽明五竹枝歌

荔枝紅深蟹黃熟銀瓶傾注浮梁玉孫楚登樓欣得朋馬
周入市空驚俗窗櫺扇扇雲母開西風送雨蒼梧來一聽
江門竹枝句壓酒恨少朝霞腮明叟才華豔溫李越羅吳
綾蜀都綺誰教珊網失南溟自弄玉笙傳北里芙蓉澤露
秋蘭香昔君酣醉江月涼墨花春動珠串光丹櫻度曲聲
斷腸纏頭未收報明璫誇道太白憐昭陽東流之水朝復
暮波蕩比翼雙鴛鴦人生快意貴多得風雨將殘天異色
君不見後來新婦今爲婆白髮青衫君奈何

匡山歌

海風撼天天欲泣颯颯靈旗踏波立趙家末造殊可憐萬
古忠魂此山集錢塘水涸白雁來天南片土宮殿開行朝

草莽列軍屋龍沉壘沒荒蒿萊半壁江東誰鑄錯此山頂
欲卑五嶽閩廣不支大節同正氣歌聲動河朔永福疑陵
今蔓草淚盡星塘馬南寶二城邨墓遙相望景炎野史悲
遺老卽今三傑日月光紀功一任淮陽王北元賸有奇男
子不負金山負應昌

明五山水圖歌

鴻雁南飛江水寒疎林影露千翠鬟使我披圖動秋興如
坐吳越扁舟間抱琴僊子丹駐顏行聽淙玉聲珊珊移情
識曲兩難遇南風妙手因誰彈看君雙鬢如秋菅意氣乃
比胎禽閑不畫蘄巖畫平遠欲令世路無阻艱人傳蝸角
爭觸蠻豚餌鈎取專車鰈置身千仞矚萬里夢裏恆岱何

從攀穗城煙樹鴉噪晚咫尺白雲失高蹇筆下丹青邱壑
深就中想得逍遙館年年奔走負青春我輩定是蓬蒿人
金鱗肥時桂酒熟遲君命駕長溪濱

爲侶竹題扇

珠簾十里夢揚州輸卻司勳壯浪遊身似浮雲無著處憐
他團扇未知秋

跋黃魯直和子舟詩卷真蹟

蘇黃詞翰兩勦敵高蹈一世身名危江西宗派在人口墨
妙亦有神靈司眼明見此雨初霽想得揮豪江閣時陸鶴
銘是大字師涪溪更讀磨崖碑金丹入手骨已換氣息內
視千歲龜明光草制要此老蠻江謫置誰所爲羣奸豈受

禹鼎鑄至性只合眉山知
綠荷菡萏無晚節黃菊拒霜多
苦姿用詩中句清商颯然動紙上營營粘壁不敢飛
丹邱仙人妙品藻崑山片玉桂一枝柯敬仲跋語
空勞仿像夜繼日羣馬當驥雄後雌
自成一家力不足隨君作計遭君嗤
翰林評畫頗貴肥君乃瘦硬通於詩
忽逢佳士失交臂客位下榻幽林思

漁人鵲蚌圖

飛潛何事角雌雄
悟到彫陵一笑空
椎碎驪珠同瓦礫
世間須有緯蕭翁

秋夜

纖月淪素彩疎星泛秋碧
中庭步履徐仰觀何厯厯
太歲

宿南斗熒惑離東壁寡學昧禪祥心賞精光射珠浦撼橫
飈桂海納歸汐寒響中夜警竹叢助蕭撼竝抑羈旅歡一
會塵憂積徂景蟻旋磨浮生駒過隙智斂得內照物遺祛
外逼且甘高枕眠明發將有役

答靜齋

別久翻無夢書遲爲暫歸秋心終不遠傲骨可能肥江靜
魚龍蟄簷深鳥雀依杜門佳節逼望望月增輝

寄贈陳文學旦

柯山富材木孤芳擢危岑陳生靜者徒秀發青青衿齊物
多闊論獵道無虛尋澹然冰蘂中時託陶韋音寒潭受秋
月流翫清人心坐持獨繭絲欲引橫江鱣風濤競疑古志

迂難視今霞珮招散仙青峯白雲深

江泛

一葉凌秋意渺然日斜潮靜翦江煙簫聲驚破閑鷗夢疎柳叢遙露翠鈿

海石硯歌

謝玉墀

丹陽

購得古硯於羊城故家使余名之余

諦視硯背物狀若波濤齧成非由人工名之曰海

石

水巖斲硯九淵下驪頷摘珠擅高價海石天成采藻奇風流合付南臺謝堅如劉公百鍊鋼靚如徐妃半面妝英英蠟梅薄點雪滑滑胡羊初割肪背有微凹蟹簍脫中央隱

露枯松節蝙蝠羣飛影蘸波遠山斜抹秋空月小試龍麝
涵春滋一飽毛錐橫陣馳想應水府重文字泮妃遣伴書
生癡錦綈髭匣何年得貴比支機贈查客晉卿鳴玉終自
豪楚國失弓復誰責靈產近出松花江洮河磁洞難爲雙
川嶽珍貢盛時有傳觀不到天南邦此石猶堪破寒陋助
君雕刻令君瘦請將詩句問陽侯可許東坡名鳳咮

檢書篋蠹紙得月查姪紅蕉閣月夜詩草次韻追和

二首

閣前紅蕉花閣上秋月色不見閣中人淚落方池碧乘化
度塵劫遺文動悽惻風迴竹木聲夢失雕鐙力問天歌楚
些誰知我心惕

仲蔚老一室子山懷小園荒穢白露滋琅玕綠雲團往日
治蔬畦經秋生宿根吟魂或歸來悄立清輝寒汝年一何
促汝意一何寬行跡忍復尋薜荔蔓頽垣

題黃仲則集後

一時猿鶴鉅公分少尹頭銜可稱君金榜名慳羅給事青
樓夢覺杜司勳折除福命才何用憔悴風情世共聞早識
巨卿真死友熱香要誓爲斯文

題黎二樵集後

膾有才名海內傳清時窮老赤明天嘔心恐落三唐後放
手能爭五子先兒女悲歡成絕調丹青邱壑送殘年於今
市井爭珍璧在日尋常負酒錢

明五爲侶竹畫古榕怪石亭圖屬題長歌

虎臥能蹲露尻脊蓬萊飛落何年石十圍榕木障天青根
節輪囷石一色此間結屋何盤桓石爲壁趾榕爲門萬景
奔前攬其要孤亭聳立如雲鸞亭內主賓兩豪逸翠暎珠
香脫身出褚公皮裏有陽秋庾統胸中無徇物寫入丹青
略相似榕石何心得知已但教闢徑爲羊求豈必採芝學
黃綺大富山頭雲霧開綠鬢窈窕窺金壘莫惜閉門連日
醉人生難得住蓬萊

侶竹所居
曰蓬萊村

消寒飲憶朴仙城東旅次

短景趨長夜高寒入遠空河南飛雪地襟上落梅風晚食
仍羈旅深杯且禦窮同來不同醉開汝穗城東

立春日作

殘臘見春歸春風暖到衣
茶香家食有詩思草心微瘠土
勤占歲閑身不厭饑疑之入市去相顧幾人肥

小除日感賦

風雨淒酸逼歲除萬家司命醉何如
鹿鳴野草思同類不辦徐耕助賑書

寒雨示朴仙

天南不識雪寒雨如牛毛盡日無雨聲
漫白低復高微風掠溪樹上與炊煙遭
饑鳥飛擇食點點凌素濤入夜轉淒
淅被酒哦離騷燈靜四壁立響枯百蟲
號村饑及歲晏袖手嗟吾曹遙想青雲
子獨處哀絃操

開歲和朴仙

開歲喧初夜寒深酒正中
焚香簾外雨行燭水邊風
僻巷尋詩過閑心許我同
二毛君見慣猶足倚顏紅

大霧行

溪南溪北人往還
背面如隔千重山
綢繆一氣天地合
虎豹夜守門九關
九關旌旆集靈路
下士昏眸不知處
罡風鼓轉宗動圓
大瀛海水盤空住
南紀古來無尺雪
微陽出土雲胎結
不聞羲和鞭日聲
桃花照酒春顏熱
數椽老屋樹壓檐
爐篆裊裊縈湘簾
文章莫問陶答子
萬斛春愁溪水添

對月贈內

寒開初見月見月上元前花外憐相對閨中記漸圓整鬢
明鏡影印履古苔煙笑問詩成未知君爲損眠

元夜

村深風雨屋蕭蕭薄酒怡情弱女嬌明月暗塵燕市飲十
年陳迹話今宵

江行漫興

一雨藏春暮影深夾江煙擁亂山沉邨邨喬木知平世歲
歲閑花損壯心白鳥想矜孤往得綠波窺見二毛侵竹竿
篷艇浮家好子美顛狂恐不禁

老農歎

老農忍饑鋤旱田惡少夜飲朝分錢採丸肱篋官不問富

家竟日停炊煙海國無警二百年杞人何事身憂天猛虎
貪狼不擇肉老農私幸倉無穀紫鬚簿吏登堂來翁媪相
顧顏如灰稱貸可憐質兒女羞從惡少乞餘財

大雨行

二月廿
八夜

萬家苦旱生計微典庫塵積田夫衣一夜風雷起龍蟄天
瓢倒建銀濤飛鐙火光搖短竹壁書聲雨聲堂廡窄先生
隱几夢天遊眼底山川玉鱗白飄然顧我雲中君翠蕤青
節香氤氳闔闔雞鳴赦羣梟揮豪爲召滄海神晶宮百寶
非帝珍散作膏澤蘇吾民木棉花開土焦赤要使五嶺週
陽春嗟爾旱魃威如焚膽落霹靂精魂分躡雲誓折不敢
語覺來身世迷處所瓦溝奔注水簾泉粉牆迸射錢塘弩

乞漿得酒占歲豐雨工不比書生窮滿地瓊酥飫饑腹家
家酣睡日升東

雨後望頂湖

綠動郊原發興新頂湖西望日初曛樹開層嶺明殘雨龍
返雙湫捲暮雲往歲遊蹤詩境變隔江春色斧柯分人間
福地僧高臥引水荒田了不聞

寄春洲

飛揚跋扈變沉深未絕韓蘇海外音身在向無知己感師
尊今有後生心寒摧丹荔多風夜潦沒青苗半月陰野鶴
山鳥鳴噪異稻梁一例苦年侵

果孫殤

義山長惜鳳雛癡驚見西風折翼時
汝母九原依我母可能歡笑倚嬌兒

六月十九日遊飛泉寺感事作歌

長松森森崖壁整天半火雲壓松頂望雲悄立空翠間
百折泉聲一人影桂嶺中分如剖瓜度仙橋俯青砦
砦驚淵蜿蜒赴潭洞玉龍穩置千年家農家遭旱逋租積
昏暮追呼山谷匿動色如披鄭俠圖關心誰辦徐耕策
我來投石驚龍眠雨澤寄爾民之天頂湖眷屬雙湫聯
喚吸江水澆炎煙腐儒饑乏不爾累奈此鳩形鵠面
今顛連白衣仙人石龕坐一滴楊枝滄海大寶陀
縹緲香霧重欲熱旃檀咒龍塵事填胸想顛倒
猛聽東閣日斜鐘

答友人

閨闔秋聲入短吟，儒冠憔悴歲華侵。
重泉兒女他鄉夢，一往風霜寸草心。
天地自閑人事迫，文章誰健我憂深。
古來王謝知哀樂，絲竹平生不解音。

和梁生落葉

那得秋風恨，都隨木葉飄。
華容年冉冉，空響夜蕭蕭。
元亮思偏室，童烏况槁苗。
深青窗外影，涼月戀芭蕉。

題吳梅邨詩集

復社名高海內歸，一錢不直素心非。
生憐令伯陳烏鳥，老羨維楨得白衣。
法曲淒涼遺史在，制詞推激昔人稀。
江東獨步才原少，肯放西山咏采薇。

守柔齋詩鈔初集卷三

辛卯壬辰

高要蘇廷魁德輔著

受業何渭校
弟廷鈞

出門

十載別長安今復萬里行整衣拜高堂強歡難爲情弱弟
性真率顧我涕淚零病婦不出房背我悲昔嬰膝下誰牽
衣一念百憂并出門屢回顧老桂亭亭青我僕亦有母豈
謂骨肉輕尸喪奈饑驅貴賤皆有營阿咸領羣從俟我孤
篷征隔面卽關山贈言感精誠丈夫四方志莫任窮愁摠
歲華何駸駸雪路何冥冥朔風送鴻雁聽是離羣聲

清遠學署訪陳雪漁

在謙

帝子讀書臺猿啼萬壑哀詞人今散置勝地我重來風暖

留脩竹齋寒對古梅明朝揮手別湖海孰論才

大廟峽

北江無緩流十里徑一折初險試中宿波勢怒將洩已過
太平角漲沙積晴雪陡立香爐峯束江作喉舌獅子不受
篙篙鋒猛相囑鴻荒有遺迹鼎鼎蜂窠綴長年督衆力錯
迂手見血乘機一轉舵引臂百鍊鐵深青凜習坎昏黃遽
出穴輕舸時低昂孤懷自超越前舟滇陽來疾帆飛鳥瞥

滇陽峽

桂水合滇涯斜穿萬山脇峻峽握其衝帆若堅陣接披圖
指前路未屆心已懾是時北風壯天聲卷木葉長菱仄徑
上半腹與山貼勇欲尋丈爭步限咫尺躡險處倏開曠佳

景歸涉獵鐵色石蹲熊霜華草鋪氈孤篠陰危橋烏鬼憩
行牒笑喚賣魚來倚篷桃花頰作膽飲今夕驚魂慰出峽
波羅坑至游絲汎泊

一峯如置鼎一峯若張箕一峯束巨傘影插清江湄羣峯
左右顧出牧牛羊嬉晚食酒正中凭窗爲解頤祝融鑄瓊
恠盡洩天南奇紅樹掩邨墟交錯珊瑚枝峯趾散白石界
破青琉璃水石一相激擺簸舟不支從此萬里行天馬脫
銜羈莫騁達路問頓忘風波時風波亦云惡達路豈不危
長嘯鸞飛鴻落日泊游絲

英德縣懷彭東郊先生寄呈春洲

朝曦光射龍頭水萬壑千巖抱城趾翁源山頂靈池液屈

注桃溪三十里攬勝須登煙雨樓此地曾屈唐英州孤忠

獨立韞瓊寶犧尊不數先秦留相傳峽山廟有先秦犧尊惜無好事論

遺愛倡建祠堂想公在吾鄉亦有彭先生令宦如公急流

退先生校錄蓬萊宮金門才彥參張馮藥房魚山班香屈

豔昔未著高步今朔雲華蹤碧落洞有先生詩刻城西學舍連雲起

青衿廣坐春風裏亭中問字幾人存地下脩文一宮止竹

石蕭清詩義堂奠得臣義兼酒狂當年彩雀兆華藻出羣

雛鳳看翱翔春洲生於英德廣文姓字誰能說一片寒山對愁絕

長風宗慤盛年非玉骨郎君臥南雪

八里排遇風

頑雲互南北寒吹失昏曉大聲江上來投林落飛鳥羣山

莽搖動萬象入喧擾人憐凍蠅癡舟似春楊裊遠遊險已
習虛警心轉小燠室猶履冰深居亦集蓼各有徇務苦自
難達生矯安得乘日車縱觀楚天杳

舟過九成臺

韶石嵯峨夕照開遇仙橋望九成臺曲江風度東坡筆得
遇重華不放來

樂昌大灘

樂昌六十灘茲灘爲巨壁風雷萬古忽蛟龍不敢宅我來
子月尾潦盡灘見脊尙挾三龍流爭此五里石先聲諸前
勢後勁接生力灘師諱約束激昂赴大敵一舟方枝梧數
舟助噴噓屢挫氣益厲競進勞未息下灘虎驀坡上灘蟻

緣壁朔風吹暮雨並作寒威逼水宿今浹旬江梅慰行客

龍中作

九龍界楚粵厯險駭初見舟徑山腹行水引坤軸轉亂石
聚魚鼈奔湍挾雷電景幽魍魎窺光驟神靈旋慄然動毛
髮恍閱西方變崖壁少歧途來往爭一綫不容千斤載遽
苦十夫牽失勢驚跼驚翻身掠輕燕三朝三暮上一上一
回戰伏波念少游昌黎懷廣殿浮名累壯志鉅觀失遐眷
腸回路復紆叢箐雜飛霰

韓龍謁文公祠

八代扶衰手中唐崛起時韓門無語錄孟子有問知西土
靈難崇南州士得師狂湖今莫挽空抱澣香思

宜章單船

紙船鐵梢公諺語頗善謹前梢水道熟指蹤定前卻後梢
握全勢應響儼受約左手支舵開右手挂篙落輕擲鯨人
梭時昂海蚌殼逆風乍鷁退觸石忽魚躍短篙低戛舷曲
肘徑使膊湍流千百轉直赴無錯愕相持未肯讓得間遽
先掠中艙客子占跼如蠶在箔去水不盈尺冰氣逼狐貉
後梢顧余笑出門齊苦樂身是不怕寒但怕官差惡單船苦役
月以善價輸官

耒陽懷龐士元

侯計山前縣曾勞國士身鳳雛能覽德驥定亦因人中策
西川定殊恩亞相均城南祠廟在百里可棲神

杜子美墓

一代傳詩史三朝老腐儒
亂離歸未得稷契志成迂古恨
南雲結遺魂北極趨靴洲
寒月上羈雁叫荒蕪

觀湘閣聽曲和蔡孝廉

顯原

錦灣漁火青濛濛市聲卷夜烏
啼風臨江高閣奏弦管清
音飛入琵琶峯桂郎嬌小倚明燭
丰姿秀奪瀟湘綠騷魂
蘭佩夢留香仙隊霓裳親授曲
野蠶作繭絲纏綿未卽登
場已可憐春情消得寒天雪
旅思深添遠浦煙煙雪霏微
度鴻影參旗光射星沙境
長笛初停漏鼓催孤舟此別
途永識曲中郎意奈何他鄉萍
水漫高歌十年重問金門
柳南國佳人感慨多

空靈岸

湘中問靈路山腹敞神構浥衣雲氣重影樹日光瘦馴鳥
歎遲迴枯僧成邂逅虛白心鏡澈深青佛鐙逗何年戲神
龍穿井出巖竇佛座下有龍井水甘冽一勺滌塵慮千偈轉機關大
教古無生天下今在宥此結香火緣布金戶殷富循廊展
清眺遠峯莽奔湊少陵領佳處妙語難爲後回帆覲賞延
來者孰尋究

衡山縣遇風寄朴仙

皇華驛外朔風呼南楚山川展畫圖衡嶽雄吞麋子國湘
江青入洞庭湖寒催殘臘人千里暖借重裘酒一壺自別
梅花看月滿平安書已到家無

長沙旅懷

枯樹霜明點點鴉
楚天寥碧望長沙
南船風掠昭潭出
西郭雲開嶽麓斜
太傅文章憂漢室
藩王池苑問誰家
熊湘閣上登臨客
今古蒼茫入鬢華

除夕

守歲銅官渚
羈愁入夜多
勁風翻積雪
巨舸破驚波
獨醉長沙酒
誰傳越客歌
男兒非刺促
壯志竟如何

下水遣興

春早客行遲
春波淨綠漪
日明山寺路
風裊酒船旗
物候東南異
山川屈宋遺
少陵棲泊處
遊屐寄遐思

宿清溝

鴉噪清溝樹帆檣帖帖停人聲屯小市籠燭亂繁星夢入
江湖白春交草木青明朝沽酒去期醉獨醒亭

嘉魚縣赤壁

曉趁東風便帆過赤壁前登壇思少將征路送華年一笑
長江去三分故壘傳黃州詩酒會游戲玉堂仙

北風

行路難如許春晴又北風聲迴洞庭野愁落楚王宮高浪
能滔日長隄欲走虹圖南鵬變化鷗鷺自匆匆

岳陽樓用杜韻

子美題詩後東南重此樓我來春雪霽身與碧雲浮湖勢
無全楚帆聲有萬舟憑欄一長嘯今古接風流

登黃鶴樓

一聲長笛倚斜暉樓上江風振客衣多少神仙名不著白雲黃鶴任天飛

武昌城

殘雪帶樓臺江城曉日開昔人乘鶴去今我食魚來南郭新栽柳西山未落梅坡公遊迹在客思渺難裁

漢口後湖

碧草黃沙雨後春廣場百戲日翻新頽垣破徑俱歌院賸與流民結四鄰

雙橋鎮

徑跨長虹過蒼茫夕照迷羣山環楚北一水入淮西市小

車聲聚年豐飯價低征途經雪後行邑笑栖栖

牛牽車

觀音巖前沙路濶小車陷沙如陷雪前推後挽氣欲絕沙
面汗滴心頭血農家領牛水畔來乞牛牽車僕告哀長繩
駕輓腳不動鞭影一掠奔晴雷沙路已盡山路開車輪鐵
落牛蹄摧平時芻牧主恩惠有力莫肯齊鴛鴦廿里崎嶇
辰至午牛乎汝爲征夫苦呼僮給直放生歸昨日忍寒今
日饑

馬鄉早發

野店無酣睡晨征尾正中堅冰嘶過馬殘月度歸鴻汝水
南流緩神州北顧雄欲尋唐宋迹徒侶各匆匆

蘭陽渡河

落日渡黃河河聲萬弩過冰開春浪長風起暮帆多險岸
分屯埽荒田入派科蘭儀城不見柴壩巨坡陀

途中口號

車碾黃塵浣客襟中原寒盡日陰陰麥田三白春如許花
柳青紅不上心

宛城遇雨寄朴仙

野色曉娟娟春遊思渺然重雲連朔漠一雨似南天桃李
芳園酒琴書上峽船雅懷吾不與驅馬踏寒煙

魯仲連臺

戰國推豪傑師儒有孟荀仲連成別調太白愛斯人東海

清風絕聊城古意新賈生年尙少慷慨論函秦

瀛王臺

豹死留皮人留名瀛王德望慙老兵四代恩榮敘長樂玩
世乃學東方生能誦夷中古詩句救時宰相隆知遇大節
何因少主乖小心幸免勳臣妒墓碣模糊過客看太師知
是誰家官神仙高臥聖人出遺魄倘恨攀龍難兔園冊子
果何物五季干戈賤經術桑相不投冰炭腸廬陵始舊春
秋筆癡頑老子儘婆娑高臺草木春光多丈夫許國身如
此其謂王家烈婦何

趙北口

趙北燕南畫本開平沙細草水雲堆十三橋柳藏春色青

向行人馬首來

入都門車上口號

十年不踏軟紅塵
放眼重看萬里春
紫陌香風來上苑
玉泉靈氣接天津
游僊可有攀龍客
入市應多相馬人
媿我西山相識舊
梅花國裏苦吟身

題鄭大就泉磨劍圖

日躔鶉火天不雨
風卷桑乾作隼土
一片家山入夢靄
悔將書劍隨羈旅
鄭君逸致冥秋鴻
躡雲時訪安期蹤
滴水巖邊坐空翠
且脫佩劍何雍容
百鍊光寒照泉碧
潛蛟畏影欲移宅
漫同賈島十年磨
未遇張華鸞人識
大街踏遍槐花黃
遙望白雲思故鄉
八排狐兔方跳梁
匣中鬱鬱龍

身藏手彈長鋏欲歸去妖氛一掃鋒如霜久溷風塵竟何
事眼前蕭爽游仙地出世殊乖小草心防身好歛長虹氣
翦燭題詩蟬夜鳴忽聞雷動天瓢傾米珠薪桂知無補想
到淙谿要洗兵

時久旱得雨八
排搖匪未靖

東溫陶舟

閭闔西風動曉寒奈君多病客長安詩家爭薄窮郊島得
見昌黎薦士難

郭同年

鍾熙 屬題松陰垂釣圖

秋風謾謾波光綠境幽不到紅塵足是誰把釣坐盤陀氣
壓蛟龍抱珠伏熟視一笑同年生薄此身手當干城三晉
山河話遊跡抵掌便作雷霆聲白華補亡志千古低首春

官寸心苦縱能痛飲讀離騷何處狂歌學漁父車馬輪蹄
又一時一畝風景夢中思謫仙倘見成絲鬢莫道投竿也
未遲

楊校錄

維屏

同寓玉極庵出燕臺鴻爪集索題傷春

傷別刻意不減杜司勳世有玉溪生固當爲斯文
興感梁昭明以閒情一賦疵淵明謂亡是可也豈
其然乎楊五試京兆皆被黜殆有託而逃者

南風手妙響朱絃目送飛鴻興渺然燕市交遊論古調秋
心搖落待誰傳旗亭小吏霏霏玉佛院昏鴉點點煙一樣
閒愁入海澗無端拚集鬢絲邊

都門對月作

明月萬里隨人來天南地北心同開九衢簫鼓鬧佳節五
雲樓閣誰仙才居到長安客何有雕蟲篆刻不離手遙對
西山淺淡妝一杯勸爾中秋酒神京作鎮萬古青氣象奪
我詩崢嶸山靈幾闕奕棋局歷劫賸得金臺名郭君往矣
來耆生清霜點鬢羞無成故園今夕話遊子誰與追歡飲
燕市客行雖樂亦思家想得中庭桂已花天上人間影相
倚不須露下咏棲鴉

九日黑窑廠登高寄春洲

春風吹我長安來秋風又送重陽杯黃花綠鬢影相媚一
醉忽忽登窑臺寒雲蕭瑟古今哀王文簡句漁洋山人安在哉
三關九塞極天杳對此欲賦慙非才城南車馬紅塵起矯

若羣龍逐流水鎮日能閒有幾人青眼高歌我誰是向傳
薊北黃金多壯志禁得輪蹄磨蓬萊可望不可到東指碧
海蒙兜羅回首西山抱斜景荻蒲夾道歸鞍靜纍纍柏下
古歡場世短意多爲誰警樊籠久脫思淵明蓬廬空視時
運傾寄書欲問東籬菊朔雁南飛天宇清

送張大漪塘

春明楊柳變秋聲偏爲行人綰別情秦晉山川燕趙酒壯
遊還足快平生

贈別楊校錄之湖南

七閩形勝福州王右旗左鼓雄相向楊家德祖方盛年奇
情更出青山上平生不解事干謁居對白雲白怡悅

楊有雲悅

山房集 長安市上醉相逢舌底轟雷眼如月黃河遠上詩有
聲酒豪才傑人皆驚明珠抵鵲那惜寶肺腑要爲知音傾
落魄天涯只如此滔滔歲月桑乾水銅式難傳快馬神錦
繆易屈新鷹技行將別我湖南去欲問靈均遠遊處九秋
風朗岳陽樓一片霜紅洞庭樹離騷景物供搜羅文章絕
調愁邊多勸君酣飲長沙酒莫學王郎斫地歌

出都留別諸游舊

一醉辭燕市風塵撲馬鞍西山無限意留與故人看

道上書所見

骨肉流離手一車饑啼翻怒小兒譁頻年蠲賑多
恩
詔猶見哀鴻未有家

趕站

渴馬奔蹄赴井泉車迎斜照坐青氍野人自覺清涼甚楊柳陰濃席草眠

瓜渚守風

欲醉江南酒將乘江北潮柳陰連日泊瓜渚颶風驕天水相吞吐金焦動搖片雲傳雨意晴快約來朝

雨泊閶門

悄聽孤舟雨能迴萬里心寒山鐘不到笠澤意何深把釣慙真隱啼鳥奈苦吟姑蘇城下水十載託知音

玉山夜

對嶺纖纖月當樓面面風水喧春舍外人倚笛聲中北望

常依斗南行信轉蓬夜涼眠正穩怯見曉光紅

湖曉

水宿先鷗起湖光欲曉天殘星迎月落遠嶂劃雲懸人辨
荆吳語帆交上下船浪遊淩浩蕩何似客幽燕

豐城行

何年吳國埋雙龍付與雷令張司空豈知神物應時出誅
邪戡亂俱無功我來訪古豐城下風色江聲逼初夜北宸
山頂斗牛懸紫氣銷殘月波瀉平吳之後妖祲生南風煽
虐危神京倒持太阿馬羣鬪天寶不救三台傾國家梁棟
人才立求劍何如求士急君不見豫章太守重三君郡治
高懸徐穉榻

酬謝孝廉朱衣

南北頻來往勞生不自謀故鄉殘月夢涼枕
贛江秋潦急知魚困村饑代吏憂腐儒成底事
飄泊一虛舟

贛州夜發謝孝廉同作

征路看牛女推篷薄醉時微風添水韻新月弄秋姿
不寐青山對含情白鷺知元暉多逸興隱霧若爲期

連州江口阻雨聞廣州人談水災愴然成詠

天似饑民面含愁慘不開江漂風拔木舟臥雨餘
苔龍戶無完屋魚頭雜劫灰連州兵罷後又報水成災

守柔齋詩鈔初集卷四

丙申

高要蘇廷魁德輔著

受業郭汝康校

西湖雜詠

丙申冬告假歸觀始遊西湖尋歷名勝省憶舊聞漫成百首貽諸同好

遊徧金焦及惠山虎邱乘興叩禪關歸裝欲載西湖去喜在東坡管領間

漸隔紅塵見碧城靈禽學得步虛聲天風忽捲松濤過疑踏金鼇背上行

野草山花媚晚冬溪迴澗折石玲瓏陰陰蒼雪衣邊落一字門穿九里松

跼銜萼放白雲間萬疊真山肖假山憑仗梵王龍象力不教飛去伴僧閒

慧業人來地亦靈遊山先問客兒亭何須佞佛方成佛卻

解繙經不受經

靈隱有夢謝亭一名客兒亭又有謝公繙經臺

海日江湖壯觀誇琳宮湧出老龍家香林五百阿羅漢幾度乘雲接

翠華

竹作牆籬水繞門園林無禁幾家村黃橙綠橘年年熟拋上峯頭餉老猿

奇境奔迎句易裁淋漓濡筆且徘徊禪房不忍汙牆粉留與空明待月來

貴戚名王愛冷泉神仙並入畫圖傳曲江春盡楊花落枉作冰山倚雪天

香積樹中石鈎風僧丁迹漫摩挲西窗事發君知不佛
力安能救議和

東南物力漸艱難比歲隄工走大官能灑楊枝退潮水海

塘應築炬師壇

洪武初海潮衝岸壞民廬舍靈隱僧慧炬爲潮神說三皈戒楊枝灑處卽止不崩時

稱炬
菩薩

鶯嶺長懸無盡燈有人摩頂識徐陵逢迎漫學支離叟不

是于公恐不勝

于忠肅彌月時蘭公摩其頂曰此救時宰相也蘭自號支離叟

寶網金幢耀上方山夔木客識君房旅遊今覺無滋味不

得胡僧大棗嘗

招得三生石上魂臨風賞月老禪門思親夢落哀松梵孝

子應須表李源

瑞像莊嚴百寶光
慈雲法雨被錢塘
至今雙檜峯前路
列肆緣山只賣香

安石東山志未酬
西峯迢遞入林幽
白雲明月忘空色不

礙高僧挾妓遊

天竺僧嗣珍政和間構精舍於西峯嘗自
比謝傳東山語人曰吾以白雲明月爲二

妓空色兩忘
何忝安石哉

南宮北使幾經過
駿馬貂裘意氣多
相值松林先避道
恐妨孤鶴警前呵

葛嶺朝陽露翠微
平章舊第草離離
從容養樂園中日
但卒木棉菴裏時

吳山一路好樓臺
南宋經營付劫灰
八萬四千吳越塔
猶餘保俶報恩來

南峯北峯排作門前湖後湖規作園種得名花三萬樹長
邀明月共清樽

君復名齊魏仲先鳳麟芝草太平年妻梅子鶴隣修竹恐
住蓬萊無此仙

青螺一點水中央處士風微野徑荒

聖祖愛才遺老出雲峯四照煥

天章

不隨劍壘屬黃星天地長留漢壽亭指盡輿圖三萬里更

無原廟比英靈

孤山關帝廟有漢壽亭侯玉印一枚白質黑章瓦紐中有一穴細紋如錦一面刻漢

壽亭侯印一
面刻侯諱

水閣松房味寂寥遠光深影託逍遙何人得似張公子金

翠叢中繪斷橋

斷橋以張祐孤山寺題句得名有作段家橋者誤蘇杭常潤間名刹多祐題詠縹流

賴其標榜者多矣

帘標龍井雨前茶真個茶香似豆花欲得謙師三昧手攜餅就近訪僧家

畫舫笙歌寂不聞斷橋疎柳挂斜曛探梅欲向西溪路一角秦亭入暮雲

金陵曾看牡丹還花市蓬廬老可閒湖上不知埋玉處吟

魂來往定孤山

西湖花市張光弼隱居處明太祖嘗徵至京師憫其老曰可間矣遣還因自號可閒

老人有春日詩云一陣東風一陣寒芭蕉長過石欄杆只消幾度夢騰醉看到春光到牡丹

賣酒人稱五柳家門前綠水漾金沙敗荷殘菊難娛客天

竹嬌紅子當花

南枝樹古檜身分父子精忠婦孺聞霞嶺桃花春二月遊
人多在鄂王墳

東南財賦水雲鄉遺愛紛紛說宋唐誰似天人經國手湖
山今日享賢王

天寒路遠獨歸遲竹外逢僧欲賦詩借問孤山山上寺阿
誰風調繼勤思

金沙隄外水悠悠煙抹殘荷似晚秋驚起鴛鴦飛一處夕
陽紅溼趁漁舟

西泠橋畔日斜時了髻能歌次仲詞正欲汎湖風色惡菰

蒲蕭瑟水參差

石次仲西湖多麗
一曲見稱於詞品

老鐵多情唱竹枝變風猶得晚唐遺斷橋無柱船無柁可

是滄桑以後詩

桃花得氣美人中題向西冷語最工可惜虞山無勁草晚香輪與柳河東

淡掃蛾眉粉黛無西施眞態筆難摹當年劉過清狂甚一騎乘風跨兩湖

檀心玉頰委蒼苔放鶴亭邊有落梅人愛西陵松柏好孤

山誰訪菊香來

林和靖墓傍相傳有士女菊香墳今不可考菊香好林詩死葬其側可謂所憑者淨

矣

風流太守戀餘杭一別西湖欲斷腸猶見中唐人意厚不拈詩酒入彈章

紫府官階事渺茫六橋花柳是甘棠棲神只合湖中地秋

菊寒泉處處香

春渚紀聞述莫夢遇東坡於西湖參從數人在前蒙問先生今何所領先生曰某

今爲紫府押衙因引東坡海外夢韓魏公事以實之語頗誕妄

新亭淚盡枕戈休上下恬嬉選勝遊若問承平真氣象夢

梁錄似夢華不

孟元老著夢華錄載汴京故事吳自牧著夢梁錄載南渡留都故事

管領湖山有偉人軍門增勝祀花神長紅小白東風裏三

百樓臺一色春

狡獪神通老鍊師仙官安用保文爲道園風骨高元代姓

字終須上帝知

西湖遊覽志載虞伯生爲土神撰保文神降乩稱謝

水迥西湖墮大星三台山上血埋青當年費盡擎天力今

日猶傳禱夢靈

濠濮閒情出梵居放生池水碧涵虛倩誰題卻蟠溪畫龍

戶無供使宅魚

春遊無處不繁華解事輿夫向客誇何似蘇隄逢老衲輕
風小槳出蘆花

未得勾留喜乍逢恍然前世賸遊蹤從橫轉側山多態朝
暮陰晴水變容

泉石蕭清孝子廬壑菴名勝足幽居攀蘿直上仙人洞更

向琴臺訪米書

壑菴在南屏山下郡人汪之萼廬墓處上有仙人洞洞上琴臺爲米元章書字徑三

尺

靈源鏡澈見鬚眉雙井遙分六一支瀉地水銀收不住波

瀾幻出在銘詞

鄭清之淨慈寺雙井記文此工六一泉見東坡集

何分蔬筍與腥膻爛漫天眞自證禪愚俗空誇神運井濟

師原是酒中仙

斜陽絢爛裏雷峯孤塔頽唐兀醉翁絕代丹青應袖手白
蓮洲畔水翻紅

南山古洞鎖煙霞十八金仙共一家細讀君謨舊題句霏
霏溜雨灑藤花

龍泓清介虎跑和不厭遊人濯濯多戲掬浪花還撫掌此
泉風味似東坡

樓臺天半俯漣漪對此高寒佇月宜斗憶瀛洲鴛鴦侶昆
明池上看冰嬉

煙澹疎林噪晚鴉朱樓碧檻是誰家荒園滿種花交榮雪
後風寒未著花

杭人呼黃矮
菜爲花交榮

窄窄湘裙短短裘三三五五下湖樓
冬前顧繡新添價齊向鹽橋拜蔣侯

天目真人應運生江東才子舊知名
討梁一策非難用自古臨安怕議兵

羅刹江頭八月濤吳兒跳盪浪花高
三千犀弩俱神勇白馬東歸避錦袍

吳越江山指顧中海門鼉立領朝宗
曾無謝朓驚人句不敢留題第一峯

老僧迎笑下苔階誤認江東賈客來
坐久不離山水話指從梅閣看花開

得月樓前辟劍池洞元雷法伏神龜
排山健筆懸河口夢

對羅浮月上時

三一卷有白
玉蟾遺跡

邂逅名山有夙緣
病來登陟未能便
五雲深處雲樓塢
留待吾家老朴仙

南塢西峯舊時尋
僧靈石和仙詩
岳陽三過無人識
又

踏紅塵到劍池

靈石寺屋椽上倒書六
言絕句相傳爲呂翁筆

紫翠橫山白鶴飛
歸雲客與晚鐘遲
西湖到底寒猶媚
想見琴孃入道時

能改齋漫錄載坡
公與琴操參禪事

薩翁遊迹兩山多
一杖敲雲絕處過
除卻老猿攀不到
至

今珠玉滿巖阿

南北兩山間多
薩直齋遺墨

不待招邀不費錢
閒雲野鶴共周旋
矜奇頗笑鍾狂客
每

個山頭住一年

浮沈避世貫酸齋敏捷詩才語近諧花草閑情拋未得棲

雲何處問仙階

酸齋名雲石元學士棄官隱居錢塘有兩妾曰洞花幽草見七修類稿

四百梅花二百松一林丹桂擁青峯約齋心在光明藏何

事安禪制毒龍

張功父捨宅爲寺有南湖北園玉照堂蒼寒堂諸勝功父自爲記

禦寒惟有荻花毬不屑談禪混俗流玩月浮盤終夜坐青

蓮標格政黃牛

僧惟政字渙然居功臣山出入常跨一黃牛世稱爲政黃牛

漲墨浮煙一點無芙蓉峯主得驪珠千巖萬壑胸中有莫

認西湖是鑑湖

劉青田集有題玉澗西湖圖詩玉澗名若芬又號芙蓉峯主

平野風吹一點香梅花如雪映迴塘無錢買得江南畫收

拾西湖入錦囊

恬退有如胡子正簡嚴還重李知幾宋朝杭郡多良牧南

渡猶能駐六飛

堅踰五柞異雙桐端木移栽德壽宮保護盤松如保國不
容蟻蠹亂江東

少章高節比忠宣未得優游葛嶺邊憑弔白龜池畔影曾
餐冰雪十三年

珠兜銀甲換宮粧小隊褰旗出教場借問麒麟高閣上蛾
眉曾否畫章梁

銷金不惜事般遊竟把杭州作汴州賴有直臣張巨濟西
湖從此罷龍舟

芝蘭曾寄紫陽居六籍翻成僞學書天下蒼生盡蘇息何
妨飽食裏湖魚

霧豹冥鴻杳莫尋
高山流水幾知音
誠齋一管生花筆
肯作韓門兩水心

建議移都智略深
辛臣不察濟時心
龍川一集無迂語
何意編君理學林

麴院芙蓉入酒香
當時官釀費平章
椒花雨勝金盞露
孰與唐翁共品詳

臨安燈色妙江南
遺製猶傳供佛龕
老卻英雄姜白石
吟隨簫鼓向三潭

暗香疎影度新聲
盲雪垂虹寄豔情
聞道馬塍花藥好
幾人攜酒醉先生

到處摻羅八社詩
卻憐坡老不同時
西湖亦有廬山遠
一

辦還須祝淨師

月地雲階春夢殘梨花帶雨淚闌干衛娘度曲滕郎醉聚

景園荒翠袖寒

滕穆與南宋宮人衛芳華幽會見樂府記聞

月照長橋復短橋香魂蕩漾未曾銷嫦娥只解隨圓缺杜宇聲聲恨浙潮

斷腸一集怨千春瓦巷人家說淑真數盡懨懨春夜雨小
青詞調更酸辛

書樓不許貴人登貞白先生冷似冰供奉遺文同舍利可
憐高足是高僧

不教豪右據湖田寒鐵錚錚氣凜然南海雙珠光不滅龐

公新法一條鞭

周巡按新龐中丞尙鵬皆南海人

人頌海陽吳道夫堰名復古利西湖報功應等周巡接會
享寒泉一盞無

世相俱空一筆勾沈郎伉儷證眞修竹窗清曠蓮池寂且
放三泉自在流

畫眉殘筆記名山叅罷慈師五乳還若把修微齊妙淨都

隨春夢入禪關

王修微號草衣道人見列朝詩集
張妙淨號自然道人見名媛詩歸

山水因緣翰墨場相遭淡泊味偏長春風秋月楊公濟百

詠如薰百和香

寶石尋常瑞石奇一邱一壑自相宜雲根倘入綱船貢豈
獨天南歎荔支

浙西才傑向來多星海尋源始見河記取徐公廉訪日一

時弦調換笙歌

西湖書院始建於徐養齋

名花分得杏檀枝香滿餘杭使越時狐貉緼袍同意氣風

光長占柳洲祠

柳洲二賢詞舊名子貢使越祠仲裔居杭者請於大吏並祀子路顏光敷爲之記祠

在湧金門外潁湖

點綴湖山百態新玉輝珠媚頌

南巡太平物色今如舊已過乾隆四十春

萬象搜來下筆難敢追前輩上騷壇自經

奎藻留題後玉宇瓊樓不覺寒

梓澤蘭亭幾變遷故家喬木尚依然山房賸得漁洋記不

減藏書小輞川

天然圖畫出荆關古剎名園恣往還從此一生無惡夢夢

中惟有此湖山

身在蓬萊也欲歸
草心長白戀春暉
浮家泛宅非吾事
欲畫西湖當綵衣

望海曾登乍浦樓
觀潮又宿浙江頭
好奇偏有方思道
勒

取新詩訂後遊

湖州方君重異同遊酌酒催詩嚴於刻濁

留耳趣近適願如方君者亦豈易得耶